



2019/E3/069

*Question déposée par Mme Anne TOMASI
Au nom groupe "Partitu di a Nazione Corsa"*

Objet : Bilanciu nant'à l'insignamentu di a lingua.

O sgiò Presidente, o sgiò Cunsigliu Esecutivu in carica di a lingua, o signora Cunsigliera Esecutiva in carica di l'educazione;

Si compie l'annata sculare, è ci tocca avà à fà un bilanciu. A sapete, a lingua hè una di e primure maiò di sta magiurità è, aldilà, di u populu corsu. Hè sta primura chì ci hà fattu palisà certi pensieri cagiunati da u so insegnamentu, è chì mi porta à dumandavvi oghje à ciò ch'è no ne simu in issu duminiu.

Di ferraghju scorsu, dopu à u rituale annincu di e dutazione urarie per i stabilimenti, è l'inchietudine per e filiere bilingue di i picculi cullegi, s'assemblea hà vutatu una muzione chì, abitudine vechja, vultava in Vignale turnendu à dumandà un statutu derogatoriu per l'insignamentu in Corsica, è chì dumandava in u frà tempu ch'elli si tenissinu à contu l'effettivi bilingui in u calculu di u numeru di divisione, è dunque a so traduzione concreta in l'ore attribuite à un stabilimentu. S'è no sapemu chì e discussione à nantu à u statutu derogatoriu avanzanu pocu è micca (è ci ne pentimu cù voi), vuleriamu verificà chì l'Educazione Naziunale si primureghja da veru di a dumanda di l'eletti di u populu : sò assicurate, o sì o nò, e classe bilingue in tutti i stabilimenti per a rientrata 2019 ?

U mo secondu da fà, u mi danu e conseguenze di a riforma di u basciogliè. A muzione vutata di marzu 2018 dumandava chì l'uzione LCC avessi i listessi vantaghji chè e lingue anziane per impedisce a cuncurrenza di e discipline è a calata prevedibile di l'effettivi. Sta dumanda hè stata ricusata da l'Educazione Naziunale. Oghje chì e scrizione in 1^{ma} sò compie, è chì dunque e scelte di i duminii di specialità è di l'uzione sò state fatte da i sculari, vuleriamu cunnosce à l'affine e conseguenze precise di a riforma à nantu à l'effettivi di l'accademia.

L'avete capita, sta quistione tratta menu d'un bilanciu di l'azzione di sta Cullettività à prò di a lingua chè di quelle chì rillevanu propiu di a respunsabilità di l'Educazione Naziunale... Senza cumpetenze supplementarie, ùn pudemu chè dumandà, ma in quellu mentre, l'Educazione Naziunale, di ste dumande chì ne face ?